

Presentacion di “Sabiduria popular, ta di nos tur”, un exito rotondo

BIBLIOTECA Nacional Aruba en cooperacion cu Instituto Pedagogico Arubano a presenta su prome actividad di aña 2010 den un sala completamente yen na George Madurostraat.

Sharon Rose y Rincon Boys a habri e anochi cu un tremendo presentacion y a deleita e publico cu ‘Mi Hamaca’, ‘Plegaria’, ‘Halado’ y ‘Bonochi te mayan’. Directora di Biblioteca Nacional, sra. Astrid Britten a yama tur hende bon bini n’e anochi dedica na Sabiduria Popular cu ta ensera dicho, proverbio, expresion, spreko, puña of conocimiento di pueblo.

Despues sr. Monrick Croes di Aruba Trading Company a haci un presentacion. Nos toast di aña nobo tabata pa cortesia di Aruba Trading. Maestro di Ceremonia sr. Mirto Lacle a duna un introduccion n’e anochi referiendo na diferente proverbio: Clabo ta saca clabo, sa puntra morto cu e kier bela, sinti di hende ta cashi di pica, pisca ta muri pa su boca etc.

Director di Landsloterij, drs. Humphrey Genaro tambe a hiba palabra y a reconoce e rebendedornan di biyechi di

Corsow na Aruba. Landsloterij tabata e sponsor principal di e presentacion di Sabiduria Popular. Nos autor local sr. Marco Christiaans a recita su poema “Wespen”.

E duo presentacion di sres. Wini Poulo y Chaco Castro tabata uno magnifico. Aña pasa e di dos buki di sr. Wini Poulo a keda presenta cu ta “Palu pa Garoti”. Wini Poulo su prome buki ‘Doshen konopi...un kabuya’ ta completamente bendi. Despues a sigui cu e presentacion di Grupo Kilele bao liderazgo di sr. Harry Zimmerman y sra. Emerita Emerencia kende a interpreta entre otro e cancion titula: ‘Na tera di galiña, kakalaka no tin palabra’, sigui pa un forum di sra. Digna Lacle-Herrera, sr. Ernesto Rosenstand, sr. Wini Poulo y sr. Chaco Castro.

A clausura e anochi cu un presentacion di kita sombre di sr. Robert Maduro y su grupo Alma Folclorico.

E anochi aki tabata un exito, y por conclui for di e comentarionan, cu mas di e anochinan aki, publico kier mas. Sigur ora ta trata di nos dushi Papiamentu, cu ta keda un idioma dinamico.

